



26. februar 2010

UPA 2010/34

Inatsisartut Suleriaasianni § 32 naapertorlugu aalajangiiffigisassatut siunnersuut imaattoq matumuuna saqqummiuppara:

**Puigortungorneq pillugu pinaveersaartitsinermik suliniuteqarnissaq kiisalu puigortungorsimasut nunatsinni annertusiartuinnarnissaat peqqutigalugu, Naalakkersuisut pilersaarummik saqqummiinissaannik peqquneqarnissaannik  
Inatsisartut aalajangiiffigisassaattut siunnersuut**

(Inatsisartunut ilaasortaq Olga P. Berthelsen, Inuit Ataqatigiit)

### Tunngavilersuut:

Puigortungornermik nappaateqarneq, (qanga nunatsinni “uternermik” taasagarpuit) annertusiartuinnarpoq. Nunatsinni nappaatip taassuma ineriartornera ersarissumik aammalu pilersaaruteqarfinginissaanut piareersimanngitsutut inisisimavugut.

Tamanna nunatsinnut tulluanngilaq eqqarsaatigigaanni, inuit taama napparsimalersartut amerliartornerat annertuujuummat. Kisitsisit nunatsinni takussutissat maannamut piginngikkigut malunnarpoq, tamannalu siunissamut pilersarusiorsinnaanissarput tusiatsippaa.

Inuit Ataqatigiinniit isumaqarpugut siunissaq ungasinnerusoq eqqarsatigalugu, pinngitsoorata pilersaarummik peqartariaqartugut. Ilisimasariaqarparput inuit taamatut nappaateqalersimasut qassit missaaniissanersut, ilisimasariaqarparput angerlarsimaffit tamakkununnga tulluarsakkat qassit missaanni pigissanerlugit, ilisimasariaqarparput ilaqtariit aamma sullinneqartussat qanoq amerlatigissanersut, ilisimasariaqarparput nakorsaatit tamaatut nappaateqarnerup kingunerisaanik atortussat qanoq annertutigisinnaaneri, il.il.

Tassa ilisimasassagut amerlasoorpassuupput tamaattumik pilersaaruteqartariaqarpugut qanoq iliuusissagut ilisimaniassagatsigit. Tamanna tunngavigalugu siunnersuutigaara Naalakkersuisut pilersarusiorissaannik peqquneqassasut.